

四庫全書

集部

欽定四庫全書

石倉歷代詩選卷一百八十六

明 曹學佺 編

宋詩六十三

林亦之

奉題林稚春菊花枕子歌

故人所說菊花枕子把冰丸月下飲秋水一雙明炯炯
數在青囊第一品狂風江上吹蒹葭往往得之嵇阮家

欽定四庫全書

閉門誦詩二十載眼睛損盡生空花建陽小作箸頭書
殘更燈火亂蟲魚石渠文字大如斗場屋歲月又不偶
却來南山青草邊東西盡為菊花田手提長筐向山曲
一下收拾三百斛昨者昏迷才起來解把簷頭小字讀
乃知妙物通羣仙一切藥裹應棄捐

丁亥九月十六夜偕李監倉宿龍卧山中聽雨
看月同時事也所謂魚與熊掌兼得之賦詩
一篇以紀其事

相喚此山來狂風吹我衣把酒桂花下山雲片段飛掩
門雨初滴開門月還上倚樹看月明半山聞雨響人間
有佳景詩句頗發越何曾似今夕聽雨還看月

九月晦日登烽火山

興來走上烽火山著足不定秋風寒四邊黃茅滑如雨
低頭一看毛髮豎幾年要到紫菜鄉大練小練并東牆
如今一時在眼傍白雲浮水天茫茫酒闌更欲弔虎屋
無端日脚相催促一奴魑髻一跛足逐我下山如野鹿

答稚春送瘞鶴銘

烹魚蒙尺牘瘞鶴有殘碑老去無他好朝來愜所思幽
懷增感激妙處自傾欹喜劇還生嘆如今愛者誰

九日遊龍卧山留一夕明日值雨坐超上人房

偶題

野興更周遭應遲問大刀山房逢雨好人意與秋高多
謝烹鮮乳還令厭濁醪重來須累少款款聽蕭騷

秋試歸訪綠煙亭

竹徑縈紆去相逢情若何江從木杪見秋向菊邊多謾
有風濤想如今歲月過惟於交舊裏聽取碧雲歌

陳文煥秀才所宅近市憑樓一望西山宛然墮
几案中縣之豪雋唱不下數十百篇野人來
承聽許不必似韻故為之賦一首

西山簷外見何必鹿門行近晚江聲合疎簾野意生終
朝如此好初月更多情却媿才華鈍三年句不成

陪范明府與諸同官飲新亭是夕以莞爾榜之

因賦此詩

把燭新亭下迂疎聊爾歌酒當清品勝官要野情多燕
豆客俱好漁竿人亦過誰知武城笑深自惜蹉跎

奉送范宰秩滿還東陽

語違今幾日猶更上層臺情自緣君子吾非送長官衝
寒去程遠惜別賦詩難政拙為遺愛留將識者看

題嚴子陵釣臺

莫向金門傲冕旒歸來却要著羊裘乾坤不是劉文叔

那得長竿到白頭

重陽次日登城山

城山冷罷冷侵衣湖上重來月滿卮未愛踈籬黃菊日
最憐秋水白雲時

九日下水口

黃花時候苦思鄉急水還家一日強不道南風打頭上
客船搖櫓作重陽

送井伯赴上庠

紫薇巷口送征鞍
白社村前豆葉寒
一賦雕蟲憐小技
千山羸馬上長安
短檠已自甘投老
健筆胡為未得官
鳳閣起家緣六館
州人更欲祝東巒

舍弟客臨平

憑誰為問鵲鴿原
燈火三更殞淚痕
天遠未知萍梗迹
書來說在藕花村
年華似汝寧為未
場屋如吾已懶言
壁水故人今北去
短長門戶好同論

憶浮家洞

萬竹蒼蒼鳥鳥啼一江渺渺薜蘿西幽懷動處蘭初長
好句來時月已低年歲却從為客盡家書長是倩人題
疎鐘日落孤村立秋燕梁空歸思迷

寄表弟章由之為理曲堆屋廬

苦來為客意何為宅舍荒村誰與治別墅雖無輞川畫
生涯堪入杜陵詩身如燕子年年去家似漁舟處處移
丹井西頭曲堆下更煩歲晚定疎籬

奉寄雲安安撫寶文少卿林黃中

泥封款款下青冥却使麾童換使輶夔子城池開幕府
杜陵詩卷作圖經十年去國未歸夢萬里看山憑短亭
可信明時好人物亂猿啼處是州廳

滕王閣懷古奉呈撫州別駕兼簡戶曹

城邊帝子閣西頭水遶南昌故郡流浦曲天長鷗侶小
夜深雲淨月華浮澹臺墓暗竹根古孺子亭荒荷葉秋
漠漠滄江無了日哦詩休接古人愁

鮑待用

已下
輓詩

去年一笑荔枝園，今歲重來是墓門。
縱有青青舊時樹，已看斜日照黃昏。

光澤朱君

諱賡字師言

二首

諸老蕭蕭似卷塵，不堪再見素旌新。
白頭縣尉笭簞浦，夜雨寒牕是舊人。

長記前回過我廬，艱難步履要兒扶。
莫將馬箠敲門去，寒水無人野嶼孤。

小練林承事

文炳

二首

薤歌纔唱已堪嗟莫道生平隔海涯曾向網山圖上見
蛇門東去是君家

生前莫問劉郎浦死後還看孟母鄰遙想芻靈穿海出
浪頭如屋自愁人

盧助教賢夫二首

山中香火今誰在那聽殘春薤曲新第一傷心惟此老
父時諸客已無人

毗耶鈔軸五千卷淨几焚香心自閑蠟燭燒殘春夢斷

逢逢哀鼓弔空山

方提舉公美

馬上姿容河朔風
吁嗟不見夕陽紅
長江自小為鄰舍
昨日歸來無此翁

林伯謨

幽情千木外
巧思百花前
好事如吾子
傷心嘆蚤年
桃蹊親意悅
薤曲里人憐
半夜悲笳起
涼天野月懸

丹井陳子白母

哀曲梧桐夜何年
苜蓿盤敬夫前輩重詩客
婦人難十月明朝盡孤墳
落日寒鹿門催作黍此意竟長嘆

松林林巖叟

誰學陶朱去梅花古戍旁
平生疎几杖哀曲損肝腸
稚子青衿雋東牀綠袖長
四更笳鼓動月白水茫茫

陳伯順夫婦

晴春相見未多時
忽嘆霜蕪雪屋非
僵瑟樓前方悼往
吹簫臺下竟同歸
讀書歷歷向秋樹
織錦悠悠空曉機

須信人間伉儷重
生年死日不相違

石倉歷代詩選卷一百八十六

欽定四庫全書

石倉歷代詩選卷一百八十七

明 曹學佺 編

宋詩六十四

陳 藻

丹井懷叔遠

喜稱吾子賦羞道少年時別去休論易愁來欲寄詩夕
陽書不到殘月夢相隨晚歲傷心事松岫獨與誰

適武陵入延平界作

人煙隨山窟家家自生理木杪挿秧青泉流舂杵起開
邊一漢皇航海通南鄙黃昏更不愁客舍連覺美

歸入古田界作

步入溪山勝橋亭古劍風土宜辭荔子村塢盡油桐南
店炊初滑西舟石漸窮豈知旬日外便訪去時蹤

城山

雲霧成佳景天明人幾回忽攜詩句入別訪畫圖開遠

樹沈如立行歌去似來小舡衝雨過高柳接湖栽月傍
孤青樹名呼怪石臺故園無夢想近擬築岩隈

虎溪

四圍山木合百磴屋簷重古穴成幽井疎林散曉峰響
泉那更月啼鳥此無冬臺上朝朝看天邊有怪松

冬日南谷讀書

列岫開平野修牆隱密林暗泉聞雨響寒日覺冬深眠
底孤村近雲邊小樹侵何須錢買屋空寺足閒吟

紀夢

自從弱冠為遊子玉融丹井壺山市哦詩不用著工夫
已謫牂牁四千里柳侯未五十羅池作刺史翰苑失詞
華蛟龍怨泥滓我今四十貧無官六合飄零到融水來
時三宿柳城村再拜前賢我如此才卑何怨嗟且述西征
始奔走豈吾心跬步思桑梓江右湖湘抵桂林青山爭
獻雙眸美青山縱好興不生萬斛羈愁懷抱裏

海口吟

按圖自古無人到二百年來戶口添架屋上山成市井
長官近海課魚鹽估客趁潮撐米入没人忍凍采蠟黏
仲尼有廟塵誰掃寺觀崢嶸香火嚴

題融州城樓

除却譙樓環廨舍蕭條市井客懷悲高高下下山無數
淺淺深深江有時大布紅裙徭女著半規白扇野人持
城中昨夜亡羊豕聞得誰家虎入籬

客中書事

千載蠻風尚有存
此來聞見不堪論
猪膏澤髮湘南婦
牛渤塗門嶺右村
行客下牀調瘴藥
吏人提甕灌蔬園
豈無佳麗堪娛目
別有淒涼只斷魂

真仙洞

洞裏清溪可汎舟
入觀洞府出高丘
老聃尸解今還在
黃帝生前有此不
滴乳解添無數
幻攜燈何用不曾
幽乾坤自大人身
小拳石空中作勝
遊

姚晉卿溪閣行

南院觀溪心已清
縈紆更上閣中行
西橫車馬市橋合
東眺遠山霞霧生
日斜沙石淺可數
半夜轟雷驅猛雨
農圃嘈嘈春水多
誰得身閒延客歌
醉後下堦齊拍手
長株矮樹排花柳
主人更要雙眸寬
去年拄杖尋長安
一行一處狂呼去
日日芳園大如許
買地比多直幾金
千屏萬障為牆堵

和林子望

夫君莫要嘆無官
幸有田園在故山
滿室清風滿林月

人生何事勝于閒

丘德基七十

斯翁千歲也何愁七十真堪駕禮修
多少人間貧病客不貪天地久相留

夜宿延平水東

浮橋殘折阻狂瀾懶問津船趨往還
雙劍廟前酤酒醉水西燈火水東看

重陽臨安舟中作

小舡獨坐看平洋歷歷登高舊日長戲把此身看寂寞
今年無酒過重陽

十月一日毘陵作

聽得常州多菜色到來市井亦安然今朝正值焦糟節
車馬翩翩上墓田

紅泉明日還福清作

獨坐無聊日已西塗經蒜嶺過漁溪一枝何處空歸亟
却理行裝羨鳥栖

過臨川懷劉氏兄弟

臨川幾日到長沙聞道黔南路更賒行見一村籬落好
誰家比住憶君家

冬日融州絕句

四隻漁船叩板門幾家茆屋長兒孫天寒水淺江成路
地僻人稀郭寨村

過象州

都無一物作生涯坊巷蕭條有幾家料得寒梅應悵恨

滿城開作寂寥花

戲題宏仲飲亭酒肆

老去雖貧有酒爐
秫田親種暫時沽
閨中不解為慳婦
閒問劉郎燕客無

擬卜居

向來為客愛塘村
幾度天邊入夢魂
恰到塘村心已懶
不知何處立柴門

盧北山元夕

社屋相忘鼓笛鳴空村步月興堪乘何須更要鰲山立
野燒天邊勝著燈

送黃欽之赴廣州鹽稅

地氣周遭逐處流五羊漸已似中州海風吹斷山無瘴
炎月何妨作宦遊

石倉歷代詩選卷一百八十七

欽定四庫全書

石倉歷代詩選卷一百八十八

明 曹學佺 編

宋詩六十五

林希逸

竹林七賢

賞靜偏憐竹宜人
况一林諸賢同逸趣
千載有遺音
避俗來深谷
披衣卧綠陰
玉人三四輩
風籟短長吟
翠入

劉伶酒聲隨叔夜琴溪千唐六逸先後許論心

松子僧前落

野迥無人迹長松不計年隨風飄子下竟日落僧前葉
暗丹誰化根枯石共堅閒敲經夾響匹數似珠圓味美
忘齋久聲輕入定便時看童行戲爭把柳絲穿

月靜庾公樓

明月今宵好曾經照庾公登樓當靜夜懷古對秋風飛
鏡綠空上危簷映水中胡牀無恙否岸幘為誰雄老子

今何在寒光昔亦同清談孤此景白髮向江東

剪燭話三巴

不負西窗約相逢剪燭花驚心如一夢對雨話三巴蠟
盡愁頻落闌重歎舊遮昔曾留劍外今却指天涯

月色不可掃

此夜一輪滿騷情不奈秋月非人可掃人與月俱愁素
魄憑誰問寒光為底留擬隨風葉去還似雪花浮竹影
搖仍在波光散未收嫦娥如戲我移照讀書樓

天際識歸舟

日夕思天際悠悠半掩扉扁舟緣底急注目識君歸帆
外殘鴉去雲邊一葉飛立須蘭棹至細認橈砧非僂指
思江路牽兒上釣磯入門相勞問賒酒趣鱸肥

山村人暮歸

點點殘鴉過孤村帶落暉籬邊聞犬吠山下有人歸遠
岫連芳塢長林遶翠微雲深認茆屋風細颺征衣樵唱
同尋徑猿驚為扣扉夜深燈火下兒女共依依

獨釣寒江雪

一葉孤舟小生涯在釣筒羣飛看鴈陣獨立是漁翁浪
與頭俱白顏因酒暫紅片帆煙渚外瘦影夕陽中蓬鬢
千莖雪蘆花兩岸風烹鱸吹荻火隔岸喚兒童

玉斧修成月

我問青天月如何缺又生冰輪看展去玉斧想修成曉
視柯誰執傳聞璞孰名元功無此巧素魄豈能盈免向
圓時搗蟾因琢夜驚廣寒八萬戶技與女媧爭

杜宇呼名語

叫盡三巴月淒涼杜宇聲今人誰與語故主自呼名啼
血嗟何意前身恨未平轉喉曾有諱弄舌似猶生姓字
諸禽識君臣易世輕提壺無意緒醉魄謾飛鳴

機春潺湲力

機事嗟何巧空村不住春潺湲因借力俯仰若為容盡
日勞雙杵疏泉隔幾峰無人長軋軋助我為淙淙碓下
僧長喜溪邊婦亦慵香厨炊已辦時借野雲封

弄花香滿衣

隔岸清風處
清晨嗅露房
花因閒弄久
衣有帶來香
試摘枝頭白
還拈葉底黃
恍如玉皇吏
來自錦窠郎
袖比朝方罷
心因惱欲狂
謝安休掩鼻
非佩紫羅裳

濟河焚舟

汜濟焚舟去
秦兵意若何
深仇思必雪
信誓有如河
甲卒方停棹
將軍怒指戈
連檣皆縱燎
勁氣欲熬波
拜賜前言在
論功一炬多
至今臨岸處
夢想髮皤皤

雁足書

中郎沙漠外，羝乳事何如。
賴有雲中雁，能傳足上書。
銜蘆來內苑，繫帛自穹廬。
地說荒寒極，人稱老病餘。
史徒誇問犬，詩莫詠烹魚。
青鳥仙家使，吾今益信渠。

為郎牧羊

卜式何為者，清班粉省郎。
不騎沙苑馬，只牧上林羊。
謾詫窠名錦，何如麝曳芒。
含香休向闕，挾冊且隨臧。
列宿從嗤我，三星喜詠羊。
尚懷肥報國，抗疏欲烹嘗。

登單于臺

天代祁連外窮荒鳥雀呼登臺真帝子絕幕遁單于百
級雲中見千官帳下趨穹廬垂曠野警蹕近清都漢地
今無虜秦城枉避胡呼韓天日謁却入渭橋圖

登封泰山

海畔山名泰東封自昔曾三千餘載記七十二回登冕
輅陳金策衣冠迫玉繩祕書留歲月立視俯丘陵華蓋
行中坂松官立幾層祖龍空刻石千載笑宜升

寒機曉猶織

機上誰家女更長睡不安當窗祇自織到曉不知寒霜
瓦凝威重冰絲續斷難梭聲隨漏盡妾意為衣單錦字
挑誰寄銀缸剔已殘姑留刀尺久零落待輸官

笛裏關山月

笛裏愁千緒更長憶故山今人吹古曲漢月照秦關霜
竹和聲切胡牀倨坐閒一輪秋塞外萬嶂野雲間此夜
聽渠弄何時照我還回思帝城角花影映朝班

隔竹敲茶白

興入盧仝椀龍團旋解包忽聞茶臼響正隔竹窓敲活
水烹新茗香風度綠梢聽知童落杵驚起鵲離巢香比
雲英搗清無水厄嘲林深留客處未羨已公茆

門多長者車

窄窄柴門下多應隱士居時人皆障面長者競迂車羅
雀寧辭客瓜牛舊有廬高軒詩李賀都騎賦相如痛飲
宜投轄何心更曳裾辛勤有此室鄙矣羨金魚

冬曉

雲樹曉層層
初霞照屋稜
冰池紋似鏤
霜瓦氣如蒸
凍想歌樵客
閒思煨芋僧
癡翁吟太早
窗下有殘燈

雨後溪橋看

綠徧東西岸
田家亦喜晴
溪因急雨漲
雲放半山明
沙外看流勢
橋邊聽淺聲
向令平十里
應與剡爭名

和春谷用弓字見寄

奴去看魚筍
兒尋射鴨弓
養痾三徑裏
取友一溪中
日

苦經簷短天如罩野穹過從人絕少訪問愧春翁

資福嶺庵前作

嶺路松陰好歸鞭為小停苔封石面紫藤絡樹身青庵
古無人住蟬多過客聽少時文會處近裏有祠庭

和後村口占一首

老去田翁多狎友年來觀主換新銜緣溪竹杖時行散
面壁蒲團漸放叅休夢筆花尋硯滴祇看貝葉守燈龕
清朝越修將禮禮留滯何妨似史談

和後村唐衣

苦著唐衣落魄多人生行樂不知他
可曾癡說飛霞佩
那肯吟思疊雪羅帶眼減多癯已甚
布毛吹盡意如何
溪鄰更有簑簪伴時整牛衣共緝莎

和田間見新秧作

新秧成段見連連風弄輕柔雨後鮮
細出水如青縷線
平鋪田似綠毛壇國貧民困憂無日
身遠心存冀有年
試問維魚誰入夢牧童三五澗頭眠

送用和劉推官入京班改

幕畫如兄有異才
嶺南聲價動諸臺
登龍尾道呼班去
為鰐魚州守印來
定有賞音相料理
何妨進卷小徘徊
遙知得意行吟處
傍柳堤看菡萏開

用珍字韻謝吳帥分惠乃弟山泉所寄廬山新茗一首

五老峰前茗草新
若為封裹入南閩
錦囊有句知難弟
玉帳多情寄野人
雲脚似浮廬瀑雪
水浪堪關建溪春

龍團拜賜前身夢得此烹嘗勝食珍

春谷惠永榕橋精舍二十四詩借首篇韻賦一

首

春谷因榕費苦吟為憐夾道綠陰陰身藏巖澗風霜老
名入圖經歲月深北客未知題詠少南州莫向字書尋
鶯啼庭葉曾留句獨賞河東刺史音

題梁秘閣玉堂何似亭

放眼久知亭外景連朝苦恨雨昏昏紅飄落桂渾如雪

青失平林總是雲與世相忘真有道休官曾不待移文
玉堂天上空回首白髮追尋我媿君

二日野望作

麥隴高低一樣青淡雲籠晝雨絲輕梅花爛熳開將盡
松葉稀疏落又生遙企鈎天知夢斷欣聞玉陛慶熙成
人人盡說新年好除夕無風歲旦晴

先母忌日

丁卯

兒正癡時賴母賢如今滿鏡白于綿可堪遠日思存日

更向衰年憶幼年
癡早獨携三稚子
世貧能有幾硯田
書燈督課無虛夕
曾解衣還束脯錢

晚步偶成十月廿八日

半空濃碧雲成嶠
上有明霞如野燒
綠田黃犬吠行人
白鳥青林送殘照
連朝毒熱勝三庚
萬木號風無一竅
松間散步信意吟
安得孫登與長嘯

曉起即事

枕上吟安未了詩
披衣跌坐自支頤
今年暖過冬強半

昨夜霜濃曉始知腰帶愈寬祇強束髮梳常落不多絲
衰殘却喜身強健歲稔村沽醉度時

曉作偶成

飲粟羹藜謾曲肱病無俗物也身輕萬錢下筋非吾事
數卷殘書了此生學淺幸無禪二障心閒喜與迹雙清
更長睡足元無夢又聽簷間促織鳴

再用前韻謝桃巷

清吟思湧似回瀾家數他年比務觀歌舞叢中知散易

功名紙上要留看吹殘柳雪寒仍在數盡花風春欲闌
好景縱多公不飲誰論麴蘖向江干

七月十二日作

投閒不厭玩心珠遮眼無他只舊書得馬塞翁從喪馬
知魚濠叟且觀魚三旬不雨田俱涸一月先秋暑未除
此念却難排遣在家無大小仰犁鋤

送光澤蘇縣丞

種花城裏談經席三載何曾有束脩別換頭銜聊佐邑

重拈手板向鄰州松廳莫笑無公事
藥幕時能致俊流
掘手溪干留飲去相思那肯靳書郵

和柯山玉上人

聞說高人意已消
非坡誰解識參寥
何年共賦浮花雪
一棹清溪兩岼苕

石倉歷代詩選卷一百八十八

欽定四庫全書

石倉歷代詩選卷一百八十九

明 曹學佺 編

宋詩六十六

張 栻

熙熙陽春詩

熙熙陽春既發既舒翼翼南畝是展是圖嗟爾農夫各
敬乃事往利爾器誠爾婦子惟生在勤勤則及時惟時

之趨時不爾達浙浙甘雨膏我下土習習其風和澤乃
普往即爾畊惟力之深往蒔爾苗勿倦其耘于日于夕
自遂自達爾日勿忘彼生孰遏惟天之心矜我下民民
不違天使爾有成既穡既實既堅既好爾穫既同先養
爾老保爾家室撫爾幼穉既迄有年復思嗣歲嗟爾父
老其訓其誠俾務于本惟土物愛不念其本乃越厥思
所思既越害斯百罹於赫聖主敷德流澤布宣弗厘時
余之責嗟爾父老助予念茲豈予之助報國是宜粵以

今日勸相于郊乃作此詩以懋爾勞

送朱元晦

君侯起南服意氣凌九州聿登文石陞忠言動宸旒坐
令聲利場縮頸仍包羞却來卧衡門無媿自日休盡收
湖海意仰希洙泗遊不遠關山阻為我再月留遺經得
紬繹心事兩綢繆惟茲斷金友出處寧殊謀南山對牀
話匪為林壑幽白雲政在望歸袂風颼颼朝來出別語
已抱離索憂

灘山

灘江卽湘江濺濺清見石其東列羣峰秋水碧復碧日出霧露收草徑上逼側憑欄舒望眼已足慰疇昔更窺岩穴勝創見爲驚惕如何數里間奇觀屢接跡寬同厦屋深劃若巨靈擘日月遞光景風雲變朝夕石橋幾年成乳竇一時滴神龍舊隱處仰視多辟易蛻跡凜猶存隱隱印霜脊下有澄湫深餘波漱蒼壁往者已仙去來者此其宅薄晚叩松關風過聲索索聊麾車騎退容我

且散策却望訾家洲輕舫渡前磧回首煙樹林已復挂
蟾魄宇曠淨餘滓羣物被光澤河洲寄遐思空岩皎虛
白清輝猶可窺水色相激射天邊與川上亭亭如合璧
居然廣寒遊不用假六翩班坐依微瀾晤賞共佳客與
之相千載詎有古今隔簫鼓歸夜闌觀者燦城陌往往
羅杯斚斑斑見殺核諒因年歲豐人意少舒適視爾意
少舒于予多忻懌

嶽麓書院

遊觀不作難呼舟渡清泚新晴宿潦淨羣山政如洗上
方凭危欄萬象見根抵寒泉自可斟況復雜肴醴高談
下夕陽邂逅玄鑰啓中流發浩歌月色在波底

題城南書院招元晦

積雨欣始霽清和在此時林葉既敷榮禽聲亦融怡鳴
泉永不窮湖風起淪漪西山卷餘雲逾覺秀色滋層林
叢綠間愛彼松栢姿歲寒心不改似與幽人期

送楊廷秀

昔人忘言處可到不可會還須心眼親未許工雕績詞
章抑為餘子已得其最當知鄒魯傳有在文字外

其二

平生風雨夕每念名節難窮冬百草歇手自種琅玕吾
子三十策字字起三歎豈欲求人知正自方寸殫請哦
碩人詩匪為樂考槃

嶽頂上封寺有懷元晦

憶共朱夫子登臨冰雪中劇談無俗調得句有新功別

去雁橫浦重來月滿空遙憐今夕意清夢倘相同

喜聞定叟弟歸

吾弟三年別歸舟半月程形容應似舊歡喜過如兄秋
日聯鴻影涼窓聽雨聲人間團聚樂身外總云輕

默姪之官

默也相從久吾心念汝多又為江漢別祇覺歲年過氣
習須消磨工夫在講磨惟應介如石人事易蹉跎

長橋

西風吹短髮復此渡長橋木落波空濶亭孤影動搖徘徊念今昔領略到漁樵擬有山中隱憑誰為一招

嶽麓書院

支筇穿百級把酒問春光喬木依然在幽蘭祇自芳未經湘水滿逾覺橘洲長暝色猶回首天涯話故鄉

與弟姪飲梅花下分得香字

日夕色愈正春和天與香提攜一樽酒問訊滿園芳嗣歲詩多思懷人心甚長更須多秉燭玉立勝紅粧

王長沙約飲縣圃梅花下得梅字

平生佳絕處心事付江梅縣圃經年見芳樽薄暮開朗
吟空激烈燒燭且徘徊未逐徵書去窮冬尚一來

仲春過陽江亭子

亭古危臨岸林幽巧近城煙容隨雨住花片著溪青春
事已如許客懷誰與傾亭前幾株樹滿意欲敷榮

城南雜詠二十首和朱元晦

原原錫潭水匯此南城陰岸花有開落水盈無淺深

右納湖

團團凌風桂宛在水之東
月色穿林影却在碧波中

右東渚

四序有佳趣今古蓋共茲
橋邊獨微吟回首忘所之

右詠歸橋

窗低蘆葦秋便有江湘思
久矣倦垂綸遊魚不須避

右船齋

長咏伐木篇竚立以望子
日暮飛鳥歸門前長春水

右麗澤

菰蘭北澗側澗曲風紆徐願言植根固芬芳長慰予

右蘭澗

疊石小崢嶸脩篁高下生地偏人迹罕古井輓轡鳴

右山齋

高樓在林杪中有千載書昔人不可見倚檻竟何如

右書樓

開軒僅尋丈水竹亦蕭疎臨流會自得豈是為觀魚

右蒙軒

流水自清瀉觸石短長鳴窮年竹根底和我讀書聲

右石瀨

雲生山氣佳雲卷山色靜隱几亦何心此意相與永

右卷雲亭

前年種垂柳已復如許長長條莫攀折留待映滄浪

右柳堤

危欄明倒景面面湧金波何處無佳月惟應此地多

右月榭

芙蓉豈不好濯濯清漣漪采之不盈把惆悵暮忘飢

右濯清亭

繫舟西岸邊幅巾自來去島嶼花木深蟬鳴不知處

右西嶼

幽谷竹成陰緣流著石清不妨風月夕來此聽琮琤

右琮琤谷

亭亭堤上梅歷歷波間影歲晚憶夫君寂寞煙渚靜

右梅堤

風吹渡頭雨撼撼蓮上聲忻然會心處端復與誰評

右聽雨舫

散策下亭阿水清魚可數却上采菱舟乘風過南浦

右采菱舟

湘水接洞庭秋山見遙碧南阜時一登搔首意無數

右南阜

送定叟弟官桂幙

事業無欲速燕逸不可求速成適多害求逸翻百憂

桃花塢

花開山與明花落水流去行人欲尋源只在山深處

謁陶唐帝廟詞

溪交流兮谷幽山作屏兮曾丘木偃蹇兮枝相樛皇何
為兮于此留藹冠佩兮充庭潔芳馨兮載陳純衣兮在
御東風吹兮物為春皇之仁兮其天四時序兮何言出
門兮四顧渺宇宙兮茫然

風雲亭辭

眷麓山之回隩有絃誦之一宮鬱青林兮對起背絕壁
之穹窿獨樵牧之往來委榛莽其蒙茸試芟夷而卻視
翕衆境之來宗擢連娟之脩竹森偃蹇之喬松山靡靡
以旁圍谷窈窕而潛通翩兩翼兮前張擁千麾兮後從
帶湘江兮浮綠矗遠岫兮橫空何地靈之久闕昉經始
乎今公悅棟宇之宏開列欄楯之周重撫勝槩以獨出
信茲山之有逢

送八兄歸廣漢

彌旬積雨禾生耳冬壑未渠收潦水圍爐情話正爾佳
乃復歸舟行萬里百年懷感卧湘城風急鵲鴒原上情
豈無他人意則真每覺軟語溫如春少年銳意凌八區
晚以樂義稱鄉閭聞人有急亦已如天報兩子雙明珠
小隱卜築蘭溪邊脩篁喬木今參天是非榮辱不到處
卷書一枰清晝眠有弟關杜門讀書人謂癡
故山未遂掃松願江頭獨立送歸時

九日與賓佐登龍山

曉風獵獵笛橫秋
澤國山河九日遊
萬里煙雲歸老眼
千年形勢接中州
丘原到處堪懷古
萸菊隨時豈解愁
此日此心誰共領
朝宗江漢自東流

和宇文正甫探梅

天與孤清迥莫鄰
祇應空谷伴幽人
千林掃迹愁無奈
一點橫梢眼便親
顧影莫驚身易老
哦詩尚覺句能新
幾多生意冰霜裏
說與夭桃自在春

和友人夢遊西山

故人疇昔隱西峰野寺幽房一徑通
無復老僧談舊事空餘脩竹灑清風
夢中尋勝忘南北句裏論心豈異同
我欲壁間題唱和他年留得唵南公

偶書

我愛庭前木葉疎病枝衰蔓手披除
從今燕坐無通塞來往風煙任卷舒

嶽麓書院

眼看飛雪灑千林更著寒谿水淺深應有梅花連夜發
却煩詩句寫愁襟

禊亭

一曲清江正可憐隔江新竹露涓涓好風成我曲肱夢
起看飛雲度碧天

城南書院絕句八首

微風習習禽聲樂晴日遲遲花氣深妙理冲融無間斷
湖邊佇立此時心

花柳芳妍十日晴五更風雨送餘春
莫嫌紅紫都吹盡
新綠滿園還可人

亭畔薰風盡日涼來從水面過新篁
悠然但覺盈襟抱
千古虞絃意未忘

林塘過雨不勝秋萬蓋跳珠瀉碧流
倚檻孤吟天欲暮
更穿芒屨上方舟

山色頓清秋欲低湖光更淨日平西
涼風獵獵傾荷蓋
歸翼翩翩度柳堤

新涼脩竹意逾靜
初日芙蓉色倍鮮
物態直須閒裏見
人情多向快中偏

四面紅蕖競綠波
晚涼奈此野情何
憑城更覺看山穩
入戶還欣得月多

拍堤水滿草茸茸
盡日野航西復東
欲去未須愁日暮
月明波面意無窮

病起城南書事二首

一春風雨水平湖
更覺湖心月榭孤
坐看百花開落徧

依然山色對清癯

茆亭泉溜四周遭花木經春一一高却望西山隔江水
徑思一葉泛雲濤

春日和陈擇之

花落花開總可憐
嶠南亦復好風煙
雨餘起我故園夢
漠漠浮鷗水拍天

又

年華冉冉春將半
花事忽忽雨滿城
想得東郊變新綠

未妨攜酒趁初晴

又

日長漸有簡編樂
春半已將櫻筍來
無數青山相慰藉
有時明月共徘徊

附尤袤詩

梅

不奈雪埋照
可堪風漏香
天寒無疹粟
日暮有嚴粧
桃李羞浮艷
松筠共老蒼
千山愁絕裏
獨自占年芳

其二

冷豔天然白寒香分外清
稍驚春色早又喚客愁生
待索巡簷笑嫌聞出塞聲
園林多少樹見爾眼偏明

蠟梅

破蠟驚春意凌寒試曉粧
應嫌脂粉白故染麝塵黃
綴樹峰懸室排筍雁著行
團酥與凝蠟難學是生香

雪

睡覺不知雪但驚窻戶明
飛花厚一尺和月照三更
草

木淺深白丘塋高下平飢民莫咨怨第一念邊兵

別李德翁

長恨古人少斯人今古人二難俱益友兩載覺情親世
態深難測心期久益真相看俱半百此別倍酸心

送趙成都

蜀道當謀帥維城孰愈公夷陵護江左斜谷顧關中北
地紛艱虎南疆聚蟻螯守攻雖有異鎮撫不妨同

其二

不但元戎貴仍兼制使雄深沈天與度簡敬學成功人
士薰陶內兵民教訓中祇應先卻穀寧復後文翁

己亥元日

玉曆均調歲啓端東風又逐斗杓還蕭條門巷經過少
老病腰支拜起難白髮但能欺槁項青春不解駐朱顏
餘齡有幾仍多幸占得山林一味閒

次韻德翁苦雨

十年江國水如淫怕見三秋雨作霖可念農家妨卒歲

須煩風伯蕩層陰
未頭昨夜憂生耳
水德何時却守心
兀坐書窓詩作祟
寒虫鳴咽伴愁吟

次韻尹朋梅花

江北江南天未春
陽和先已到孤根
斜枝冷落溪頭路
瘦影扶疎竹外村
水部未妨時遣興
玉妃誰復與招魂
天寒好伴羅浮醉
明月清風許重論

梅花

竹外籬邊一樹斜
可憐芳意自萌芽
也知春到先舒蕊

又被寒欺不放花索笑幾回驚歲晚相思一夜繞天涯
直須待得垂垂發踏月相攜過酒家

其二

冷藥疎枝半不禁眼看芳信日駸駸雪霜不管朝天面
風月能知匪石心望遠可無南北使客愁空費短長吟
年年准擬花排恨不道看花恨更深

落梅

清溪西畔小樹東落月紛紛水映紅五夜客愁花片裏

一年春事角聲中歌殘玉樹人何在舞破香衫曲未終
却憶孤山醉歸路馬蹄殘雪襯東風

入春半月未有梅花

枯樹扶疎水滿池攀翻未見玉團枝應羞無雪教誰伴
未肯先春獨探枝幾度杖藜貪看早一年芳信恨開遲
留連東閣空愁絕只誤何郎作好詩

德翁有詩再用前韻一首

文章仙伯記仇池每想橫斜竹外枝未放柔柯攢玉雪

稍看紅蒂染燕支別來望遠憑誰寄老去尋春只恐遲
把酒問花花解語定應催促要和詩

次韻渭叟蠟梅

快瀉鶯黃若下春要將香色鬪清珍蠟丸暗拆東君信
梔貌寧欺我輩人光價未輸何遜早詩篇重見豫章新
渾金璞玉爭多少要與江梅作近親

甲午春前得雪

寒聲昨夜響蕭蕭逗曉堦庭亦已消殘臘距春無幾日

一年飛雪只今朝微陽欲動梅驚萼餘潤纔沾麥放苗
天意未能違物意漫留殘白占山腰

其二

飛英回旋逐風飄爽氣令人意欲消荏苒流年春送臘
殷勤密雪暮連朝冬回庾嶺花無數煙暖藍田玉有苗
一飽自今真可望更看南畝麥齊腰

其三

凍雲排陣擁山椒待伴還應不肯消皎月冰壺千頃夜

冷煙茆屋幾家朝梅枝堆亞難尋萼萱草侵凌不辨苗
殘甲敗鱗隨處是被誰歆折玉龍腰

劉屯田墓壯亭

劉諱渙
字凝之

西澗當年卜考槃便于神武掛衣冠後生無復知前輩
故老猶能說長官三尺荒墳埋玉冷百年壯節倚天寒
表章賴有羣賢力誰把生芻奠一餐

送趙子直帥蜀得須字

射策當年首漢儒去登雲路只斯須飽聞治最誇閩部

已有先聲到益都壯畧定羗元自許宗英帥蜀舊來無
前驅叱馭休辭遠看取東歸上政塗

其二

帝念西南在一隅簡求才德應時須羗夷種落誇威令
秦隴關河聽指呼自古功名多少壯及今談笑定規摹
玉山舊政人誰記應掃棠陰看畫圖

海棠盛開

兩株芳藥傍池陰一笑嫣然抵萬金火齊照林光灼灼

彤霞射水影沈沈
曉粧無力臘脂重
春醉方酣酒暈深
定是格高難著句
不應工部總無心

玉簪花一名鷺鷥

一種幽花迥出塵
孤高恥逐艷陽辰
瑤枝巧插青鷺扇
玉蘂斜欹白鷺巾
難與松筠爭歲晚
也同葵藿趁時新
西風昨夜驚庭綠
滿院清香惱殺人

別林景思

三年無德及斯民
獨喜從遊得此君
囊之一錢窮到骨

胸蟠千古氣凌雲論交却恨相逢晚別袂眞成不忍分
後夜相思眇空濶尺書應許雁知聞

送晦庵南歸

二年摩手撫瘡痍恩與廬山五老齊合侍玉皇香案側
却持華節大江西鼎新白鹿諸生學築就長虹百尺堤
待哺飢民偏戀德老翁猶作小兒啼

送提舉楊大監解組西歸

征轅已動不容攀回首棠陰蔽芾間為郡不知歌舞樂

憂民贏得鬢毛斑
澄清未展須持節
注想方深便使環
從此相思隔煙水
夢魂飛不到螺山

送吳待制帥襄陽

方持紫橐侍西清
忽領雄藩向暑行
誰謂風流貴公子
甘為辛苦一書生
詞源筆下三千牘
武庫胸中十萬兵
從此君王寬北顧
山南東道得長城

石倉歷代詩選卷一百八十九

欽定四庫全書

石倉歷代詩選卷一百九十

明 曹學佺 編

宋詩六十七

真德秀

登南嶽山

煙霞本成癖，况復遊名山。
舉手招白雲，欲納懷袖間。
崎七十二羅列，皆蒼顏。
振衣遇長風，浩浩天地寬。

送裘司直得請西歸

輕舸龍山頭木蘭作雙櫓飄然裘司直乘向南昌去問
君鵲鸞中脫身遽如許棲遲三十年始得官掌故少須
上上考豈不登省戶自言野心性眯目九衢霧脩竹歲
云晚萱草秋亦暮嗷嗷投林鳥猶得反其哺江西父母
國非復昔饒裕蠻煙一腥穢樂歲且狼顧遺黎空杼柚
行旅窘刀布天門竊萬里可望不可愬君今佐元帥安
危繫一路瘡痍俟滌濯畫諾歸伙助先聲姦人喘高節

懦夫慕過當再前席一正天子度白鷗沒浩蕩蒼鷗在
指呼我亦南陔人扁舟從此具

長沙新第呈諸學士

莫清彼瀟江莫峻彼衡嶽澄光挾秀氣日夜相回薄月
吸珠含胎虹貫玉生璞子生有苗裔溫然粹而慤一童
與三何雙鳳兩鶩鶩奮身辭草萊正論吐諤諤彤庭拜
恩歸天香尚盈握良才國之寶一見我心樂平生功名
會萬里初奮脚永肩致主念更勉經世學錨銖分義利

毫縷辨純駁相期激清風與俗洗氛濁誰與指其南是
邦有先覺

司理弟之官岳陽相別於定王臺悽然有感為
賦五言古風二首以餞其行

定王百尺臺長安萬里目昔人思親心山川誰能局於
焉共登臨使我增感觸微霜隕陔蘭悲風撼庭木銀山
在何許白雲但空谷搔首重裴回冥冥江樹綠

先民不可見懷哉金玉音士雖一命微愛物宜存心矧

茲園扉內白日變重陰求情竊楚下寃哉詎能禁諄嘿
漫弗省鬼神為悲吟子徃莅其職朝夕惟欽欽祥刑弗
留獄斯語真良箴

浦城勸糶

陽和二月春草木皆生意那知田野間斯人極顛顛殷
勤問何由父老各長喟富室不憐貧千倉盡封閉只圖
價日高勿念民已弊去年值飢荒自分無噍類幸哉活
至今且復遇豐歲庶幾一餉樂養育謝天地豈期新春

來米穀更翔貴况又絕市無縱有濕且碎何以充飢腸
而復多拏累恨不死荒年免使見憂畏我聞父老言痛
切貫心肺行行至平洲景象頓殊異白粳玉不如一升
纔十四問誰長者家作此利益事父老合掌言子文姓
陳氏起家本儒生疇昔樂賑施憶昨艱食時巨室爭謀
利米斗三百餘獨收七十二三都數千口受彼更生惠
開庫質弊衣假此賙貧匱取本不取息所活豈勝計我
曹非此翁久作溝中瘠吁嗟薄俗中乃有此高義吾邦

賢使君愛民均幼穉一聞平糴家襃賞無不至或與旌
門間或與錫金幣獨有潁川翁寵光未之被故作行謠
庶徹鈴齋遽且俾殖利徒聞風默知愧天道極昭明勿
作幽遠視

會三山十二縣宰

皇皇造化鈞橐籥生萬彙林林滿穹壤異體實同氣痛
癢本相關彼已當一視矧惟守令職休戚我焉寄盍推
若保心睠焉撫孩穉橫目事征求往往學頑痺牀剝膚

已侵鷹擊毛盡勢但期已豐腴遑恤彼顛顛近來二十
年貪風日滋熾蒲萄得涼州西園閔成市環瞻郡邑間
大半皆汙吏民窮盜乃起原野厭枯蒿哀哉罹禍徒念
之輒揮涕天地忽開張清飈掃氛曠我乃於此時撫旄
泰為帥顧慚老儒生蹇拙乏長技同官為僚友努力圖
共濟惟閔古大都星羅邑十二豈無良大夫與我同厥
志要如羔羊直委蛇自無愧勿為碩鼠貪踣躅乃多畏
上方明黜陟我亦公舉刺民言即豐碑令聞疾郵置黃

堂一卮酒殷勤抒至意慎勿多酌予憂心正如醉

遊鼓山

六月二日偕潛夫參謀諸友遊鼓山飲湧泉亭
明旦登天風海濤坐白雲亭追懷昔遊愴然有
感偶成拙詩奉呈并簡住山明師

嚴宸有追詔趣上太守符疲民未蘓醒還顧空躊躇來
尋靈源盟喜與佳客俱始酌清冷泉一浣丹墨滲超然
九溔中置身在水壺遲明陟危亭雲濤渺空虛煙霏條

開闔峰巒時有無常哉此絕觀雄壓東南隅蒼崖萬仞
立四面環瓊琚翠木巧蔽虧午亭清陰敷令人澹忘歸
似到真華胥憶昨泛蓮日選勝邀朋徒摩挲巖上刻慨
仰趙與朱舉觴酌且盟一節期終初重來三十年恍如
隔朝晡並遊四五人存者獨老癯有懷子陳子感歎為
歎歎子抱明月終我方長塗趨顛踣懼不免儆省當何
如願言祝同社著力相攜扶禪伯亦可人新結峰頂廬
老我故倦遊軒冕非所娛會須脫塵鞅來依嬾瓚居

送吳定夫西歸三首

吾衰倦對客晤語惟青山修竹引清風時為掩柴關今
晨何人來蹋破莓苔斑驚顧復自喜不妨伴虛閒
世情重聲利榮塗足超走夫君何獨為經年闔林數東
尋金壇翁南訪玉峰叟借問兩臞仙來時輕健否
麻源在何許茫茫白雲端悽其一布裘何以禦風寒歸
來有餘師興盡當知還便好斲空谷賸種青琅玕

贈上饒葉子仁為人推算筭占往往如破的歲

乙酉余方在從班子仁以書來勸補外甚力
未幾果去國進退得喪豫定如此子術亦奇
矣哉茲來過余衡茆為賦小詩因以自釋云
易象推占妙入神勸人忠孝更諄諄只今誰似君平術
惟有南陽賣卜人

花正紛紅俄駭綠月纔團鏡復沈鉤世間萬事都如此
莫遣雙眉鎮日愁

附真山民詩 公生於宋末每謂芝蘭豈與衆草伍

遂自隱居不仕諱其名字但稱為山民云識者以其
不愧文忠公乃祖而張伯子服公之才節謂宋末後
出一淵明也

興福寺

為厭市喧雜攜詩來此吟鳥聲山路靜花影寺門深樓
閣莊嚴界池塘清淨心松風亦好事送客出前林

樓居

攜書來過此便覺少塵埃簷冷留雲宿窗明報月來閒

愁山隔斷幽夢鳥呼回湖海元龍氣從渠俗子猜

蘭溪舟中

一舸下中流西風兩岸秋櫓聲搖客夢帆影掛離愁落
日魚蝦市長煙蘆荻洲篙人夜相話明發是嚴州

冬雪

雪凍飛禽少林深落葉多寒塘倒山影空谷答樵歌不
有梅花在其如思詩何霜風吹落帽應歎鬢容皤

春行

東風物物新花外步清晨蕉葉卷舒雨鳩聲問答春園
林三月景詩酒百年身試數交遊侶如今有幾人

李脩伯山居

俗子目不到幽扉何必局苔衣和月卧山雨籬泉聽有
髮徒班白無名入汗青未應閒度晷尚可掃玄經

清明

清明今日是原上一經過新墓塚無數未來人更多此
生曾悟否不樂復如何莫待澆墳土樽前且醉歌

寄郊月蓬

煙波秋草外活計一漁蓬
淡月明寒葦新霜醉曉楓
身雖殊出處道豈有窮通
俯仰看人面何如數過鴻

漁浦晚秋旅懷

西風吹夢越中遊
剪剪輕寒入短裘
鴈字不將鄉信寫
蛩聲空和旅吟愁
郵亭細雨孤燈夜
漁市斜陽一笛秋
是處山川即吾土
仲宣何用怯登樓

春曉山行

風曉連陰作快晴，瘦筇扶我步山楹。
路從初日紅邊過，人在野花香裏行。
古木殊無超世態，幽禽懶作弄春聲。
棕鞋蹋偏山南北，只與白雲相送迎。

春曉雨

破曉簷花未放乾，披衣和夢倚闌干。
釀成苔暈地猶濕，老盡鶯聲風正寒。
無客醉敲金鐙響，有人眠怯翠衾單。
牡丹一夜成消瘦，下却朱簾不忍看。

泊舟嚴灘

天色微茫入暝鐘。嚴陵湍上繫孤蓬。水禽與我共明月。
蘆葉同誰吟。晚風隔浦人家漁火外。滿江愁思笛聲中。
雲閒休望飛鴻影。身即天涯一斷鴻。

連城春夜留別張溪

飛絮遊絲客子心。連城那忍遽分襟。青燈應見詩情苦。
濁酒不如交味深。一榻暖風栖竹屋。半闌微月立花陰。
離懷今夜先收拾。盡付明朝馬上吟。

夜坐

足馬平生汗漫遊如今寂寞老林秋小窗半夜青燈雨
幽樹一夜黃葉秋懶看世情寧睡去怕傷時事莫吟休
寒蛩可是知人意未到莎根只說愁

春行

短帽輕衫步履遲微暄天氣乍晴時池融嫩碧銷殘凍
春剪新紅綴舊枝嵐翠滴衣堪入畫禽聲到耳足供詩
東風苦欲招人醉頻掉橋西賣酒旗

東粵廟

顏闕斜照網蛛絲陳迹悽涼萬古悲
柘水尚鳴亡國恨杉松曾見受封時
碑因苔蝕無完字城為田侵失舊基
當日東甌知幾戰如今贏得一荒祠

江頭春日

風暖旗亭煮酒香醉醒纔悟是他鄉
駕言行邁路千里豈不懷歸天一方
春事漸消鶯語老離愁偏勝柳絲長
無聊莫向城南宿淡月梨花正斷腸

初夏

一葉薰風帶暑回
雨天濃翠與庭槐
不隨春去鶯猶在
好競時粧榴乍開
剪刀旋裁新白苧
杯盤聊薦舊青梅
篋中敝扇投閒久
依舊團圓入手來

幽棲

鶴護松扉久不開
蒲團端坐思悠悠
故交只向夢中見
閒事不經心上來
雙屐躡雲春採藥
孤筇掛月夜觀梅
東風似見山童懶
自與幽人掃徑苔

山行

林梢初日弄陰晴
露浥溪花笑欲迎
澗寂只聞泉滴瀝
山青剩見鷺分明
林根忽轉還如遶
石角徐牽祗似平
莫謂詩成無與和
風篁也解作吟聲

客中遇鄉友李若遠歸省親

河梁邂逅話襟期
獵獵西風透袂衣
酒臉未隨紅葉醉
鄉心先逐白雲飛
客中送客難為別
山上安山胡不歸
借使家書君可寄
此間無復問庭幃

山人家

片雲遮斷嶂西風三兩山花屋角紅幾畝桑麻春社後
數家雞犬夕陽中拾薪礪底青裙婦倚杖簷間白髮翁
我亦願來同隱者種桃朝暮趁東風

朱溪澗

路轉峰迴又一村天寒大半掩柴門雲融山脊嵐生翠
小嚼沙洲樹出根任擁重裘風亦冷未投荒店月先昏
今宵只傍梅花宿贏得清氛入夢魂

吉水夜泊

入夜始維舟黃蘆古渡頭眠鷗知讓客飛過蓼花洲

草

草枯根不死春到又敷榮獨有愁根在非春亦自生

楊妃

三郎掩面馬嵬坡生死恩深可奈何瘞玉驛旁何足恨
潼關戰處骨埋多

山間早春

小桃枝上認年華隨分紅開一兩花將謂東風只城市

也吹春色到山家

三月晦日

九十風光能有幾
東風遽作遠行人
樽前莫惜今朝醉
明日鶯聲不是春

山間秋夜

夜色秋光共一闌
飽收風露入脾肝
虛簷立盡梧桐影
絡緯數聲山月寒

石倉歷代詩選卷一百九十

欽定四庫全書

石倉歷代詩選卷一百九十一

明 曹學佺 編

宋詩六十八

劉克莊

荔支巖

洞內小石如
荔支者無數

異境閔神奇一罅通深阻呀然張蟾吻光怪腹中貯始
來尚覲面稍進但聆語迴頭失塵世束縕行里所石房

容十客石柱徑丈許眠焚若將吠墮果疑可咀平生聞
化城今見玉樓櫓陟高既趨捷循狹或偃僂忽逢路窮
處淺浪隔洲渚心知仙聖居欲到無飛羽向非新燭力
往還何異瞽重遊儻未卜聊向詩中覩

伏波巖

懸崖萬仞餘江流繞其趾仰視不見天森秀拔地起中
間既深豁旁竇皆奇詭惜哉題識多蒼玉半鑿毀安得
巨靈鑿永削崖谷趾緬懷馬伏波往事可追紀千層戍

浪泊樓船下湟水

棲霞洞

往聞耆老言茲洞深無際閭中或識路塵外別有世繼
思絕人事齋糧窮所詣棋終出易迷炬絕入難繼孤亭
渺雲端于焉小休憩憑高眺城闕擾擾如聚蚋盡捐滓
穢念遂有飛舉勢山靈媚清遊雨意來極銳濛濛濕莎
草浥浥涼松桂暝色不可留悵望巖扉閉

五月二十七日遊諸洞

來南百慮拙所得惟幽尋別余玉雪友共此丘壑心江
亭俯虛曠穴室窮邃深是時薄雨收白靄籠青岑棄輿
追野步却扇開風襟炎方豈必好差遠輦鼓音且願海
氛息莫問神州沈徘徊惜景短留滯畏老侵昨遊感鶯
哢今至聞蟬吟常恐官事繁佳日妨登臨譬如逃學兒
汲汲貪寸陰何因釋膠擾把臂偕入林

戴秀巖

戴秀者兵卒
也得道于此

茲巖視諸峯厥狀尤崢嶸舊為碧蘚封新有朱棧橫縻

腰尚恐墮東炬劣可行外狹中乃寬始聞俄忽明仰窺
神魄悸俯顧形骸輕遂覽丹爐基微聞玉鼓聲源深足
力盡路黑雲氣生不辨晝夜分恍疑世代更嘗聞學神
仙所得由專精豈吾諸名士羨彼一老兵欣然約同志
嗣此將尋盟安知無白鹿絕頂來相迎

和太白潯陽紫極宮感秋

翰林兩仙人偶來聽風竹蕭蕭玉千竿采采綠一掬少
時負不羣中歲乃見獨嗟余長十年所至戀三宿徑當

還笏歸奚俟探著卜夜郎與僭耳老大費往復宜州殿
其後路險車又覆山中采芝去舍下炊梁熟

宿庄家

茅茨迷詰曲度谷復踰陂世上事如許山中人不知牛
羊晴卧野鷺鷥晚歸池精識為農意秋輸每及時

黃檗山

出縣半程遥松間認粉標峰排神女峽寺創德宗朝鶴
老巢高木僧寒曬墮樵早知人世淡來住退居寮

晚春

花事匆匆了人家割麥初雨多田有鵲潮小市無魚禿
筆回僧簡袈衣看古書經年稀見客磬折轉生疎

蒜嶺

到此思家切寒衣半淚痕燒餘山頂禿潮至海波渾僕
怕昏無店人言近有村吾生輸野老笑語掩柴門

張麗華墓

臺上栢蕭蕭空堂閉寂寥芳魂三尺土往事幾回潮墮

翠尋難見埋紅恨未消猶勝江令在白首入隋朝

二將

石俟
韓仔

二將同時死路人聞亦哀力窮鏖轉急圍厚突難開戰
骨尋應在殘兵間有迴傷心郵遞裏隔日捷書來

哭吳杞

七十未陞舍目深雙鬢殘病中依佛寺死處近嚴灘俗
薄揮金少家貧返骨難遺言令火葬聞者鼻皆酸

勝業寺

寺創于何代問僧皆不知
槎牙夏后栢殘缺柳侯碑雪
過禪堂冷冰餘嶽路危上封
猶未到太息負心期

遊水東諸洞次同遊韻

桂山前未到今日是初遊
招鶴登青巘呼龍俯碧湫
深溪通秉炬小竇劣容舟
豈敢輕題詠同官盡柳侯

郊行

薄有西風意郊行得自娛
山晴全體出樹老半身枯
林轉亭方見江侵路欲無
何妨橋纜斷小艇故堪呼

清惠廟

來訪古祠宮迢迢過水東一條溪不斷數里竹方通
巫拜分餘昨商行禱順風粧樓空百尺半仆夕陽中

嚴關新洞

羽客初尋見因于此葺廬未能平險峻先擬架空虛
磴路樵相引山名尉自書看來臨驛道未必有仙居

哭章泉

小扉通水竹幽絕少比鄰家似巢棲者詩非火食人于

今無宿士若昔有先民強作徵君誄居然語未親

送趙叔愚赴潯州理掾

未奉三雍對聊為五筦行鄉書踰嶺少詩思入湘清遠
宦身差穩中州事日生向來幾離別此會最關情

送趙守仲治

放逐諳時態惟侯意味長醴為狂客設羹許老人嘗南
國留棠舍西郊閉草堂臨期先作惡未可倚剛腸

送陳霆之官連州

郡接湖南境孤城若箇邊
茆寮愁問宿峽石善驚船
官小無迎吏詩工有續編
古人高妙處不過覽山川

送王梅州

州境與潮鄰徐行止浹旬
瘴鄉均一氣鹽子亦吾民
日晏烟嵐斂兵餘戶口貧
定將田里事閉閣細條陳

其二

禍始自三檣苗猶被一方
帝將安渤海君肯薄淮陽
老手何由斲新眉尚費粧
漢庭褒郡最早晚入為郎

早行

店媪明燈送前村認未真山頭雲似雪陌上樹如人漸
覺高星少纔分遠燒新寧須看堠子來往暗知津

暝色

暝色千村樹遙峯帶淺霞荷鋤歸別墅乞火到鄰家戍
鼓聞更遠昏燈見字斜小軒風露冷自起灌蘭花

北山作

骨法枯閒甚惟堪作隱君山行忘地脈夜坐認天文字

瘦偏題石詩寒半說雲近來仍善蹟外事不曾聞

郭璞墓

先生精數學卜穴未應疎因捋虎鬚死還尋魚腹居如
何師鬼谷却去友靈胥此理憑誰說人方寶葬書

堯廟

帝與天同大天存帝亦存桑麻通絕徼簫鼓出深村水
至孤亭合山居列岫尊尚餘土階意樵牧踐籬藩

贈高九萬并寄孫季蕃作

諸人凋落盡高叟亦中年行世有千首買山無一錢紫
髯長拂地白眼冷看天古道微如綫吾徒各勉旃

全孫季藩遊淨居寺

滿院靜沈沈微聞有梵音不來陪客語因恐壞禪心俗
姓歸全少家門悟已深戒衣皆自納因講始停針

客中

漂泊何須遠離鄉即旅人炊薪嘗海品書刺謁田鄰婦
寄寒衣少山來曉夢頻小兒仍病瘧詩句竟無神

春暮

一畝青苔半落英，蜂忙蝶懶互卿卿。
燕泥乾後兒初落，魚尾輕時子徧成。
閒拂午窗驚野馬，夢遊天竺聽華鯨。
舍南有柳纖纖在，不奈雙蟬占取鳴。

雪

衰同無葉報蕭颼，卧聽窗聲作許愁。
繁暗冷光侵研几，瓦疎飛片落香篝。
病思結客遊梁苑，往愛提軍入蔡州。
也欲訪梅湖畔去，黃塵滿袖欲盟鷗。

遇雨

與客同登萬仞崖蔽天風雨驀然來六丁白晝誅炎魃
百怪蒼淵起蟄雷毒蟒噴時林盡黑怒龍裂處石中開
吾生不及觀河決得賦斯遊亦壯哉

瑞香

一樹婆娑整復斜多君輟贈到田家自慚甕牖繩樞子
不稱香囊錦傘花小借暖風為破萼旋澆新水待抽芽
丁寧童子勤封植留與甘棠一樣誇

漁梁

春泥滑滑雨絲絲一路陰寒少霽時
水入陂渠喧似瀑雲從山掩上如炊
燎衣去傍田家火爇燭來看野店詩
落盡梅花心事惡獨搔蓬鬢繞殘枝

冶城

斷鏃遺鎗不可求西風古意滿原頭
孫劉數子如春夢王謝千年有舊遊
高塔不知何代作清笳如訴昔人愁
神州只在闌干北幾度來時怕上樓

鄭寧示邊報走筆戲贈

曾客嫖姚與伏波，慣騎生馬擁琱戈。
金臺有命終須築，鐵硯無功亦且磨。
見說帛書來汝洛，又傳氊帳迫淮河。
只今西北多機會，吾子南歸竟若何。

醴陵客店

野郭依稀隔渡頭，解鞍來倚店家樓。
欲攀桂樹吟招隱，因看梅花賦遠遊。
市上俚音多楚語，橋邊碧色是湘流。
直南鄉國幾千里，目送羈鴻起暮愁。

寒食清明

寂寂柴門村落裏從教插柳寄年華
禁烟不到粵人國上塚亦携龐老家
漢寢唐陵無麥飯山蹊野徑有梨花
一尊徑藉青苔卧莫管城頭奏暮笳

落梅

一片能教一斷腸可堪平砌更堆牆
飄如遷客來過嶺墜似高人去赴湘
亂點莓苔多莫數偶粘衣袖久仍香
東風謬掌花權柄却忌孤高與主張

其二

昨夜尖風幾陣寒
心知清物久留難
枝疎似被金刀剪
片細疑經玉杵殘
痛叱山童持帚去
苛留野客坐苔看
月中徙倚憑空樹
也勝吳兒賞牡丹

老馬

脊瘡蹄蹇瘦闌干
火印年深字已漫
野澗有水朝洗怯
破坊無壁夜嘶寒
身同退卒支殘料
眼見新駒鞞寶鞍
昔走塞垣如抹電
安知末路出門難

老妓

籍中歌舞昔傳聲
顚顚猶存態與情
愛說舊官當日寵
偏呼狎客小時名
薄鬟已脫梳難就
半被常空睡不成
却羨鄰姬門戶熟
隔牆張燭到天明

老儒

向來歲月雪螢邊
老去生涯井臼前
舉孝廉科非復古
給靈壽杖定何年
空蟠萬卷終無用
專巧三場恐未然
猶記兒時聞緒論
白頭那敢負師傳

老僧

半間古屋冷飈飈死盡同叅偶獨留昔已尋師遠行脚
今惟見佛小低頭殘經無用聊收取破衲難縫且著休
年少還知貧道苦曾同王謝二公遊

老奴

少賤腸枵破褐單傍人門戶活飢寒自從毀齒初成券
直至長鬚尚不冠冷炙時需筵上餽秃芒旋掃白邊殘
他時縱取封侯印僅得君王踞廁看

老妾

傷春感舊似中酲
樂器全拋曲譜生
自少抱衾無怨色
閒時擁髻尚風情
曾陪太尉斟還唱
猶記司空眼與聲
着主衣裳為主壽
莫如琴客別宜城

老兵

昔擁琱戈射鐵簾
可堪蓬鬢照冰髯
金瘡常有些兒痛
鐵甲今難寸許添
至老安能希駱甲
從初悔不事蒙恬
莫嗟身上衣裘薄
猶向官中請半緡

丙辰元日

免騎朝馬赴南衙五見空村換歲華
旋遣尉人挑薺菜
虛勞座客頌椒花
不施行馬釣編戶
雖飲屠蘇殿一家
二十宦遊今七十
却于身外復何加

宿千歲庵聽泉

因愛庵前一脈泉
襍衾來此借房眠
驟聞將謂溪當戶
久聽翻疑屋是船
變作怒聲猶壯偉
滴成細點更清圓
君看昔日蘭亭帖
亦把湍流替管絃

贈陳起

陳侯生長紛華地却似芸香自沐薰鍊句豈非林處士
鬻書疑是穆叅軍雨簷兀坐忘春去雪屋清談至夜分
何日我閒君閉肆扁舟同泛北山雲

南浦亭寄所思

只是從前瘦病身官卑活計太清貧買來晉帖多成贋
吟得唐詩轉逼真生擬棄家尋劍客死當移冢近騷人
秋風爛熳吹雙鬢目送停雲欲愴神

老歎

肘後奇書懶更開只今年鬢已相催但聞方士騰空去
不見童男入海迴無藥能留炎帝在有人曾哭老聃來
醉鄉一路差堪向終擬劉伶冢畔埋

烏石山

客子家山亦此峰可堪投宿聽疎鐘旋沽村酒開霜柿
欲訪禪扉隔暮松鄉信寫成無便寄寒衣著綻倩人縫
遠來只為營瓜圃不是貪渠萬戶封

鳳凰臺晚眺

經月疎行臺上路秣陵城郭忽秋風馬嘶衛霍空營裏
螢起齊梁廢苑中野寺舊曾開玉帳翠華久不幸離宮
小儒記得隆興事閒對山僧說魏公

烏石山

兒時逃學頻來此一一重尋盡有蹤因瀉戲魚羣下水
緣敲響石闢登峯熟知舊事惟鄰叟催去韶華是暮鐘
畢竟世間何物壽寺前雷仆百年松

葺居

兵火間闐鬢欲絲歸來聊卜草堂基
架留手澤書堪閱
爨有躬耕米可炊
畏濕先開通水竇
貪明稍斫近簷枝
旋移梅樹臨窗下
準備花時要索詩

去春

去春烽火照江邊
曾草軍書夕廢眠
萬里旌旗真屬命
一丘耕釣且隨緣
偶然謝客原非病
閒亦尋僧不為禪
尚有惜花情味在
銅餅終日玩芳妍

宿囊山懷洪岳二上人

憶在山中識二僧一亡一已拂衣行壁間笠徒名藍掛
寺外松過壽塔生隴月定知今夕恨澗泉猶咽舊時聲
隔房侍者皆新剃不似閒人却有情

方寺丞新第

一生不蓄買田錢華屋何心亦偶然客至多逢僧在坐
釣歸惟許鶴隨船按行花木皆良友主掌湖山有宿緣
京洛貴人金谷裏安知世上有林泉

方寺丞皖子初成

舟成莫厭野人過久欲從公具釣簑
積雨晴來湖面濶殘花落盡樹陰多
新營小店皆依柳舊有危亭尚隔荷
所恨前峯含暝色不然和月宿烟波

答翁定

牢落祠官冷似秋賴詩消遣一襟愁
喜延明月常開戶貪對青山懶下樓
客詫瀑奇邀往看僧誇寺僻約來遊
何當與子分峯隱飢嗅岩花渴飲流

送葉知郡

家在春風住二年借侯無路意悽然到來不飲官中水
歸去難謀郭外田燈遠村民多點塔擔輕津吏易排船
壺公亦似追程送青過囊山古寺前

仙遊縣

不見層崗與複巖眼中夷曠似江南烟收綠野連青嶂
樹闕朱橋映碧潭丞相無家曾住寺徵君有字尚留庵
荒山數畝如堪買徑欲誅茆老一龕

被酒

酒戶當年頗著聲，可堪病起困飛觥。
醉呼褚令為傖父，狂喚桓公作老兵。
舊有崢嶸皆鏟去，新無壘塊可澆平。
投牀懶取騷經看，只嗅梨花解宿酲。

薔薇花

浥露含風匝樹開，呼童淨掃架邊苔。
湘紅染就高張起，蜀錦機成乍剪來。
公子為貪桃夾道，貴人偏愛藥翻階。
寧知野老筇筵下，亦有繁英送一盃。

送李用之察院赴潮州

烏府名臣暫擁麾霜稜聊復變春熙
行人猶謂驄當避聖世初無鯁可移
粵俗相携看上日韓祠配食付他時
極知不作周南滯禁闥須君補闕遺

送陶仁父

自古送行情味惡君行快似泛仙槎
新班人少先投卷下水船輕易到家
南浦不堪延草色西湖尚可及荷花
諸君若問栖栖者為說吟詩兩鬢華

移竹

借居未定先栽竹為愛疎聲與薄陰一日暫無能鄙吝
數竿雖小亦蕭森窗間對取添詩料郭外移來費俸金
自笑明年何處在虛簷風至且披襟

訪李鋼草堂不遇

細路縈紆入野田遙瞻竹樹已欣然青苔地滑跌盧老
蒼耳林深迷謫仙不羨玉堂在天上徑須茆屋占雲邊
極知謝客非為亢貪看林花聽澗泉

友人李先輩丑父嘗以夷成詩二帙示余莫知
為何人所作心甚愛之過延平客有袖詩一
章見訪始知夷成者蓋葉君之別號也鬚髮
皓然矣詩與人皆可重因用其韻為謝

筋力都非少壯時不煩攬鏡覺吾衰展禽出仕曾三已
表聖歸休有四宜飽閱交情悲世道差強人意賴君詩
此生到死慙三士本自難招况易麾

端平初元召審八
士余預焉惟張洽

趙端願范炎三
君子力辭不至

題小室

已向深林卓小庵是中僅可着禪龕
士師何止三無愠
中散居然七不堪一去重華那復得
方當盛漢勿多談
近來弟子俱行脚誰伴山僧面壁叅

其二

阡陌東西山北南半生常帶散人銜
何曾雲夢芥八九
一任狙公芋四三閣上大夫投欲死
甕間吏部寢方酣
可憐子駿無家法下見先人面有慚

鐸背

史祿渠至
比分水

世傳靈渠自秦始南引灘江會湘水楚山憂楮石畏鞭
鑿崖通塹三百里篙師安知有史祿割牲沈幣祀瀆鬼
我舟閣淺懷若人要是天下奇男子只今渠廢無人脩
嗟乎秦史未易訾

築城行

萬夫喧喧不停杵杵聲丁丁驚后土徧村開田起密竈
望青斫木作樓櫓天寒日短工役急白棒呵責如風雨

漢家丞相方憂邊築城功高除美官舊時廣野無城處
而今烽火列屯戍君不見高城齧齧如魚鱗城中蕭疎
空無人

運糧行

極邊官車守戰場次邊丁壯俱運糧縣符旁午催調發
大車小車聲軋軋霜寒晷短路仍滑擔夫肩穿牛蹠脫
嗚呼漢軍何日屯渭濱營中子弟皆耕人

寄衣曲

征夫去時著紵葛征夫未回天雨雪夜呵刀尺製寒衣
兒小却倩人封題上有淚痕不教洗征夫見時認針指
殷勤著向邊城裏莫遣寒風吹腸理江南江北一水間
古人萬里戍玉關

破陣曲

黃旗一片邊頭迴兩河百郡送款來至尊御殿受捷奏
六軍張凱聲如雷元戎劍履雲臺上麾下偏裨皆將相
腐儒筆力尚跌宕燕山之銘高十丈

戊辰書事

詩人安得有春衫
今歲和戎百萬縑
從此西湖休挿柳
剝栽桑樹養吳蠶

晚春

書幌泠泠子夜風
杜鵑啼月小墻東
江南詞客惜春老
清曉披衣拾墮紅

臨溪寺

一徑松花颭紫苔
東風落盡佛前梅
道人深掩禪關坐

金史卷一百九十一
莫聽鶯聲出定來

碧波亭

了却文書上馬遲
白蘋洲畔有心期
斜陽忽到傳觴處
落盡梨花啼子規

豫章溝

溝水泠泠草樹香
獨穿支徑入垂楊
薺花滿地無人見
惟有山蜂度短牆

西山

絕頂遙知有隱君
餐芝種秫鹿為羣
多應午竈茶烟起
山下看來是白雲

宮詞四首

出海新蟾玉半鉤
風翻荷蕩起栖鷗
女郎定有穿針約
偷看明河記立秋

涼殿吹笙露滿天
木樨花發月初圓
君王少御珊瑚枕
多就宮人玉臂眠

一夜秋風入碧梧
蟬聲永巷月華孤
幾回夢裏羊車過

又是銀牀轉轆轤

先帝宮人總道粧遙瞻靈柏淚成行舊恩恰似薔薇水
滴在羅衣到死香

病起

病裏登樓怯曉風愛他殘雪映前峰旁人休問何郎瘦
不見梅花過一冬

滄浪館夜歸

萬匹沙場似電奔轟天笳吹簇轅門而今出借東家馬

煙雨孤行小麥村

西風

性愛芙蓉淡復穠
倚欄終日待西風
池邊數本無消息
愁絕東家半樹紅

歲晚書事

荒苔野蔓上籬笆
客至多疑不在家
病眼看人殊草草
隔林迢遞見梅花

歲晚郊居苦寂寥
日高鹽酪去城遙
深深榕徑苔墻裏

忽有銀釵叫賣樵

久旱即事

暘烏下飲百川空
民自祠龍禱社公
豈是長官渾忘却
水車聲不到城中

宿別瀑上

十里荒荆手共開
屐痕厯厯在青苔
山中猿鳥愁余去
爭問先生幾日回

謝墳

一月山行未有梅曉來戲著小詩催謝家墳寺更衣處
初見牆西半樹開

湘潭道中即事

敗絮龍鍾擁病身十分寒事在湘濱若非野店拈官歷
不記今朝是立春

衡永道中

過了衡陽鴈北迴鄉書迢遞託誰哉嶽山石鼓皆辭去
惟有湘江作伴來

深溪驛

苔滿朱扉半闔開
更無人跡獨徘徊
湘江臨別如相語
早買扁舟出嶺來

秦城

缺甃殘碑無處尋
當年築此慮尤深
君王自向沙丘死
何必區區守桂林

書壁

綠衣蒲屨小綸巾
四壁清風一榻塵
誰謂先生貧到骨

百金新聘竹夫人

楔亭

年年春草上亭基
父老猶能說左思
寂寞當時修楔處
一間茆屋兩殘碑

桐廬

桐廬道上雪花飛
一客騎驢覓雪詩
亦有扁舟簑笠興
江行恰怕子陵知

馬上口占

陌上鞦韆索漸收金鞭懶逐少年遊
晚風細落梨花點飛上春衫總是愁

芙蓉

湖上秋風起
摧歌千株映柳更依荷
老來不作繁華夢
一樹池邊已覺多

悼阿駒二首

北轍南轅有返期
吾兒掣手去何之
夢中玉雪來懷抱
愁絕林鐘喚醒時

人生憂患本無涯
強取瞿聃語自排
吾母白頭尤念我
吞聲不敢惱慈懷

桐廬舟中即事

車前鸞帽同聲散
闕外華簪一揖休
惟有浙江潮好事
肯隨逐客到嚴州

江山道中

純年未覺中年暖
薄酒難禁二月寒
可惜一溪桃李樹
貪程不得過橋看

春陰

春陰欺得病夫身，偶值晴天一欠伸。
客舍無誰相管領，半簷紅日苦留人。

潮惠道中

春深絕不見妍華，極目黃茆際白沙。
幾樹半天紅似染，居人云是木綿花。

木蘭詩

出塞男兒勇，還鄉女子身。
尚能逢北敵，斷不慕東鄰。

鶯梭

擲柳遷喬大有情
交交昨作弄機聲
洛陽三月春如錦
多少功夫織得成

飲方園

纔入中年會面難
誰知白首此團樂
不妨時駕柴車出
只作初騎竹馬看

蜂媒

蜜口傳來好信通
為花評品嫁東風
香鬚粘得花英去

疑是纏頭利市紅

梅

籬邊屋角立多時
試為騷人拾唾遺
不信西湖高士死
梅花寂寞便無詩

秋晚

江頭落日照平沙
潮退漁舟閣岸斜
白鳥一雙臨水立
見人驚起入蘆花

芙蓉

池上秋開一兩叢寧妨冷淡伴詩翁而今縱有看花意
不愛深紅愛淺紅

秋風

黃葉蕭蕭忽滿街獨騎瘦馬豫章臺莫將宋玉心中事
吹上潘安鬢上來

附方信儒詩

題龍隱巖

春波飽微綠斗柄含空明方舟貫巖腹鷺鶴相酬鳴仰

窺穹窿頂宛轉百怪呈僅餘鱗甲碎不見頭角獐下闕
清泠淵演迤萬頃澄但同魚鳥參勿遣蛟龍驚扶苔撫
竒篆倚棹看題名三將標竒勲自與山不傾誰歟贅小
築政恐山靈嗔南澗更幽絕仙佛依崢嶸太虛可為室
豈復資樂楹乳泉助茗椀中有冰雪清何須驂鸞去此
即白玉京鼎來不速客抱琴勿遲迎愛此無絃曲巖溜
同一聲為君洗塵耳喚我詩魂醒祇愁白衣到好句無
由成

又

石門元不鎖巖屋本無基
九夏花猶在千年樹倒垂
僧閒方定起客到每歸遲
甚欲眠蓬葉沿崖續斷碑

桂州黃潭舜祠

西風攪桂樹落日明楓林
遊子懷歸期余悲渺登臨
虞山一何高湘水一何深
英皇僅枯冢寂寞薰兮琴
我欲奏古曲俗耳更洼淫
古器不可見聊作相思吟
相思長相思相思無古今
一歌衆鳥聽再歌萬籟音
推手君勿相思相思無古今

歌有酒且孤斟落落此時意寥寥千載心五絃毋庸絕
四海誰知音

題雲巖軒

不用窮探費杖藜
隱然林壑挾重厓
曾遵月洞千巖上
更看雲巖一段奇
拂拭軒窗容俎豆
發揮泉石借聲詩
瞿曇頗似知人意
已約梅花帶雪移

玩珠巖

歸舟多載小江春
重訪東巖舊履痕
揅水峭崖猶有路

垂天怪石本無根
金華仙伯真知己
薏苡將軍足斷魂
安得北山公可作
倩渠移取向家園

題龍隱巖

愛山那怕走千回
生怕前驅後騎催
石上參差鱗甲動
眼中在處畫圖開
鷗鷺未辨乘風去
浮鷁何妨載雨來
人事百年俱變滅
祇應題字不塵埃

又

雨脚初收魚尾霞
滿溪流水半溪花
尋源曾識武陵洞

泛宅如浮蒼雪花但得嵌空元有路何如峭絕不容車
道人辛苦經雲水成塔從來是劫沙

遊中隱巖至新洞作

尋徧洞天三十六蒼靈獨闕此巖扉旋除野草開新逕
遮莫寒藤刺客衣歲月偶同題壁字烟霞似不放人歸
把茅欲作開山主已落瞿曇第二機

石倉歷代詩選卷一百九十一